

叢書集成續編 第二七五冊目錄

史地類



宋編年

宋宰輔編年錄二十卷(二)(卷十三至卷二十).....

宋 徐自明撰

敬鄉樓

一

宋紀事本末

太平治跡統類三十卷.....

宋 彭百川撰
清 張鑑撰

適園

一七九
七四七

西夏紀事本末三十六卷首一卷(一)(卷一至卷十三).....

四夷尤賴秉鈞之大亟頒廷號登冠台符具官李俊德明謨宏

才遠器學貫天人而守之以虛靜之量識窮治忽而發之以忱

恂之詞蚤冠輪魁旋持從橐嘉猷婉畫久翔政路之榮偉譽英

聲凌亞家司之重粵從定策彌見竭成日月增輝方壯朝廷之

勢風塵大警遠深邊鄙之虞盡忠而人絕間言制勝而慮無遺

算謝安之矯情鎮物足抗苻秦李靖之料敵臨機何憂突厥國

威既振民志以寧是用序陞宅揆之官進貳納言之任文階峻

陟井賦陪敦以彰體貌之嚴以示倚毗之厚惟時所望非朕敢

私於戲杜如晦長於斷謀坐翊昇平之運姚元崇善於應變永

符康泰之期勉紹徽聲佇觀丕績

邦昌少宰制曰股肱之起元首庸聞舜命之歌舟楫之濟巨川

備載高宗之命聿求雋望式贊鴻圖在考謹以惟精願登庸之

編年錄卷十三 一 敬鄉樓叢書

敢後誕膺孚號明告治廷具官張識敏而器宏才全而學博潔

於行己保禮義廉恥之四維端以立朝懋正直剛柔之三德粵

登臨仕亟告嘉猷念天步之方艱憂民心之未安允資厭難尤

賴協恭是用擢升亞揆之榮進貳上台之重仍兼官於鳳沼俾

亮采於龍墀併衍爰田申加眞食庸昭異數益示殊恩以朕初

載論相之明爲爾盛年得君之寵於戲救寧中外矯情當慕於

謝安鎮服遐守正宜師於裴度欽承予訓益懋乃功

太學生雷觀上書曰臣爲陛下略撫前朝宰相姦術之大

者言之假紹述二字以行己之作爲假國字二家以主己

之好惡假享上二字以充己之私欲致使黠虜幾危社稷

而陛下受莫大之困辱者皆前朝相臣非其人之故也白

時中老謬無用罷相之日公議稱快咸謂陛下必能擇賢

而相之翌日宣麻遞遷李邦彥張邦昌邦彥邦昌亦前朝

輔相之無狀者察其操術亦不過持兩可以同寵養恩而

已今日之相莫若誠心廣求不可謂天下無其人也旨

雷觀上書論事可嘉賜出身除秘書省正字 康王及少

宰張邦昌出使於幹離不軍中康王之爲質也金人見而

憚之遂欲別易親王并要駙馬都尉一人是時割地議和

已定金人斂兵以待之康王及張邦昌歸自虜寨乃進張

邦昌爲太宰肅王及太宰張邦昌駙馬都尉曹晟遂質於

金國軍前中興

同日趙野門下侍郎自通議大夫

王孝迪中書侍郎自通議大夫

蔡懋尚書左丞自中大夫同知

編年錄卷十三 四 一 敬鄉樓叢書

孝迪中書侍郎制曰朕以冲眇之身獲纂承於丕緒撫艱難之

運思圖任於舊人眷時者英久去廊廟肆加褒詔用協朝具官

進止詳華風度凝遠學足以翊襄於帝載文足以潤色於

王猷偏揚從藁之華入侍西臺之峻謀謨底績譽望映時曾未

見於設施已見疑於讒間朕肇膺付託想見儀形諒茲涵養之

深益富經綸之蘊其還舊服佇聽嘉猷張守

三月庚子命趙野同蔡攸奉迎道君皇帝癸酉蔡懋爲京

城四壁守禦使二月戊辰懋爲行營使李邦彥方主和議

忌李綱主戰因其敗而中傷之綱遂與种師道皆罷乃命

蔡懋爲行營使諸統制既回綱已罷矣史

癸酉唐恪同知樞密院事自正議大夫

格字欽叟錢塘人是歲秋以延康殿學士知杭州聞京師

被園遣兵官邊順以兵勤王太學生陳東上書乞召恪及

徐處仁置諸左右而李邦彥亦薦恪遂召還闕除同知樞

密院事

辛巳路允迪簽書樞密院事自朝散大夫試兵部尚書遷資政殿學士除

允迪宋城人乙酉允迪使河東粘罕軍未幾奉祠去建炎

元年五月資政殿學士前簽書樞密院允迪召爲戶部尚

書中興

丁亥种師道同知樞密院事自檢校少保靜難軍節度使河北河東制置使除

師道字彝叔世衡之孫也師道兵至闕下以師道爲同知

樞密院事京畿河東河北路宣撫使四方勤王兵並隸之

二月癸卯蔡懋罷尙書左丞資政殿學士依前中大夫知大名府兼北京留守七日

制日圖事揆策入則參籌於廟堂御衆牧人出則宣威於屏翰

編年錄卷十三 五 敬鄉樓叢書 第二輯

惟留都之重寄控朔部之要衝肆疇公方以重吾府具官蔡懋智謀

閱遠風節勁彊材足以敷萬微器足以包衆美早由峻望備歷

華塗藹然聲猷著於朝野尹正天邑訟有舐笛之清獻納中臺

任增喉舌之重頃陞樞筦協贊機謀逮茲嗣服之初擢宣左綱

之峻恪勤匪懈夙夜在公適師旅之方興顧邊隅之多事矧全

魏之都會當北道之襟喉筦籥攸司股肱是屬仍參華於祕殿

用增資於師垣召公分陝之行蓋資夾輔李勣長城之踰野顧

分憂運精神而折衝謹疆場而慎守以蕃王室式固爾猷

六月臣寮上言蔡懋天資險薄臨事傾側諂事蔡攸結爲

死黨攸在樞府邀求宰相知懋尹京可以頻對使懋日論

王黼黼雖罷相道君知蔡攸素無學術不命以相攸尙引

懋同爲樞密以相助己方當京城圍閉懋在本兵之地卒

無一言以助計畫按懋昔以父確事跡妄加增飾誣詆

宣仁皇后垂簾時事欺罔道君乞御製確傳載懋誣詆之

詞伸其父勞中外讀之無不痛泣此又懋可誅之大罪也

有旨落職宮祠臣寮再論有旨降充中大夫秘書少監分

司南京亳州居住先是政和末蔡京以太師領三省與

宰相鄆居中每議論輒不相下及居中將除母喪京恐居

中復相位乃收用懋由是論其父定策功傾王珪以沮居

中蓋居中王珪壻也懋奏元豐末先臣確受遺定策本末

徽宗信之至拜懋同知樞密院事贈確清源郡王封確愛

妾爲郡夫人御製確傳以賜之立石墓下贈碩待制諸弟

諸子諸孫壻爲侍從爲郎爲監司一門貴震當世至是中

書舍人顏岐始論懋誣罔宣仁請逐之詔懋落職與宮祠

編年錄卷十三 六 敬鄉樓叢書 第二輯

中書舍人安扶以爲懋罪未正願加投竄遂有亳州居住

之命其後諫議大夫楊時等相繼論列詔下侍從官議定

聞奏而諫議大夫徐秉哲又取新史繳奏之詔令從官一

就集議嗚呼未及施行而北狩之禍作矣太上皇卽位之

明日始下詔令國史院別差官撫實刊修闡揚宣仁保佑

之功於是追貶蔡確蔡卞邢恕爲散官而懋亦以散官安

置嶺南天下咸仰英斷焉丁未

同日徐處仁中書侍郎自觀文殿學士中大夫大名尹除

字文虛中簽書樞密院事自資政殿學士中大夫除

處仁中書侍郎制曰植屏建侯出則蕃宣於方國圖事揆策入

則謀謨於廟堂矧惟化源之機實在政本之地我疇副貳宜屬

老成具官除稟資剛明受材英傑術業足以謀王體而斷國論

詞藻足以雕皇樸而斷帝文逢辰亨嘉致位休顯雍容禁彙有入告之嘉猷密勿政塗底緝熙於庶績久寄于宣之逸旋膺分闕之行當北道之喉襟掌陪都之管籥能固守於疆場寬克憺於威稜惟折衝邊庭既久勞於碩畫而調穆天宰矜入贊於不平宜亟解於麟符進參聯於鳳沼朕有命令克審出納之司爾罄忠嘉謫聞啓沃之益勉摠素蘊協濟康功

虛中簽書樞密院事制曰國家設中天紫極之輔以應泰階之應列右府鴻樞之司以總萬兵之政雖文武之道有異而安危之寄不殊眷時謀謨之臣必授英傑之佐具官字文虛中學窮精稜識造幾微雄略淵深而足以與樞懿文炳蔚而足以華國早由英譽薦曆要塗擒藻揚華密起鼇宮之草參籌婉畫武帳之

兵比資方叔克壯之猷亟膺召虎于宣之命有嚴共武之服不編年錄卷十三敬鄉樓叢書

戰屈人之兵茲銜命於金人仍通和於鄰好敏於專對卒以解紛其參筦於樞庭共圖回於兵柄矧宏雋烈克嚙皇威本精神而折衝運帷幄以決勝勉推平日之議論用濟一時之事功

先是處仁建議乞下詔親征而實於王城按兵不動以張國威會朝廷已有親征詔仍以尙書右丞李綱爲行營使處仁卽移書於綱言備禦方略皆廷議所未決者以聞上嘉歎再三詔褒諭略曰卿首陳忠論四檄授兵豈惟謀之具臧信矣仁者必勇事平當以宰相召卿至是遣使移行

二月辛丑宇文虛中使幹離不軍齎割三鎮詔書以往乙巳復以簽書樞密院事再使於幹離不軍前姚平仲等既敗乃除宇文虛中簽書樞密院事使於幹離不且言仲等擅用兵甲幾誤和議因遣割地使割三關之地史遺

壬寅詔褒贈故宰執范仲淹司馬光張商英日六

詔褒贈近世名臣故任資政殿學士戶部侍郎贈太師進封楚國公諡文正范仲淹可特追封魏國公故追復右正議大夫司馬光可特贈太師故任觀文殿大學士通奉大夫贈少傅張商英特贈太保應元祐黨籍元祐學術指揮更不施行先是熙寧中王安石爲政盡退故老大臣用新進少年盡變祖宗法行新法元豐間神宗悔之欲復祖宗舊制更用舊人乃因官制書成自禁中帖定圖本先謂宰輔曰官制將行欲取新舊人兩用之又曰御史大夫非司馬光不可蔡確進曰國是方定願少遲之至七年秋資治通鑑書成特拜光資政殿學士賜帶如二府儀一日又語宰輔曰來春建儲以司馬光呂公著爲師保意以謂非

編年錄卷十三敬鄉樓叢書

光公著不可以託聖子安石雖在金陵不易也嗚呼天下不幸未及建儲而帝升遐此後世所以有朋黨之禍也元祐初或謂光曰元豐舊臣如章惇呂惠卿輩俱小人他日有以父子之義間上則朋黨之禍作矣不可不懼光正色曰天若祐宋必無此事遂改之不疑宣仁又嘗宣諭輔臣曰他日還政之後任用左右常得正人則與今日用心無異若萬一姦邪復進眩惑動搖則反覆可憂劉摯時爲中書侍郎深念宣諭之言退而奏疏摯疏曰臣料其離間之計一曰先朝造法爲治而皇帝以子繼父一旦聽臣民之言有所更改二曰先朝之臣多不任用如蔡確等受顧命有定策之功亦棄於外以謂改父之道改父之臣是譏間之說也云云及蔡確之貶新州范純仁又謂呂大防曰此

編年錄

卷十三

九

敬鄉樓遺書
第二輯

路荊棘久矣吾曹開之恐自不免大防不聽是時既斥章惇輩於閑地俱銜怨刺骨而劉安世賈易呂陶諸賢不悟自分黨相毀至有川黨朔黨洛黨之語一旦宣仁上僊章惇入相蔡京兄弟翕然俱進纂述王安石爲主託繼述之文借朋黨之說以屏逐異己之人同指以爲元祐黨盡竄嶺海之外呂大防秦人無黨范祖禹蜀人師司馬光不立黨亦不免竄逐以死徽宗卽位於是陳瓘首以立賢無方往事可監爲上言瓘之奏曰臣竊見自熙寧以來至今三十餘年天下之事已經四次更改熙寧改治平元豐改熙寧元祐改神考紹聖改宣仁逐一開陳本末願以前事爲鑒神考獨任王安石宣仁獨任司馬光可謂合天下之心矣然其末流不能無弊神考末年復思司馬光宣仁末年復相范純仁蓋有救弊之意也獨任賢人猶不能無弊况於獨任一惇乎明年改元建中靖國蓋上意欲建中道而無間於熙豐元祐也其後蔡京用事改元崇寧者崇熙寧也朋黨之禍再作矣至是夷虜亂華徽宗禪位上乃下詔司馬光范仲淹可贈太師張商英可贈太保元祐黨籍元祐學術指揮更不施行

丁未

庚戌李邦彥罷太宰

觀文殿大學士太一宮使
依前起復特進十四日

制曰大臣事道必嚴去就之規明主佑賢務全體貌之意眷時元輔久執化鈞方引疾以辭榮用疏恩而渙號具官李毓德淳厚秉心曠夷以高文揆藻於禁林以偉望奮庸於政路遂參夢卜進任台衡不叙羣材以大明於國是力裁衆弊曾不顧於身謀迨予纂紹之初載嘉翊戴之職登之冢宰倚以遠猷方四郊

多壘之虞惟一日萬幾之廣雖稍間於綏定念正賴於枚寧忽覽奏封力斬謝事諫言屢遣章却復來惟陳諠之甚高遂貪賢而莫獲加班榮於秘殿紆使組於殊庭併衍戶租是昭眷禮於戲進而許國既朕心朕德之咸知退不忘君尙嘉謀嘉猷之入告往安素履用體眷懷

編年錄

卷十三

十

敬鄉樓遺書
第二輯

邦彥自和宣六年九月拜相至是年二月罷入相踰年會金人入寇邦彥建言遣李鄴使虜講和已而虜薄城下時尙書右丞李綱爲親征行營使主用兵之議未幾大將姚平仲擅將兵夜劫虜寨失利朝廷罷綱右丞翼日士庶伏闕乞復用綱衆至數萬人聲言欲歐擊宰執李邦彥出省幾及之於是皇恐乞致仕遂有是命拜罷邦彥等舊皆兼神霄玉清萬壽宮使二月十三日宰執兼神霄玉清萬壽宮使副者並罷太學生陳東伏闕上書乞罷李邦彥用李綱神師道太宰李邦彥遂罷初李綱神師道既罷李邦彥堅主割地之議遣割地使及遣使議和陳東發憤伏闕上書會於宣德門下者數百人其書言李邦彥曰時中張邦昌趙野王孝迪蔡懋李悅之徒所謂社稷之賊也爲今日計莫若斥邦彥等援綱而相之宰相吳敏叟南仲必不與綱共事更願速降詔旨召徐處仁唐恪等置左右而閩外之事盡付神師道專之會虜復攻城邦彥適遇軍民被罵拾瓦礫擊之邦彥躍馬奔入朝堂乃免百姓皆言金人攻城急乞召李綱捍賊淵聖從之乃召綱復用爲尙書右丞兼同知樞密院事親征行營使兼都提舉城壁守禦使使登西壁百姓見綱皆呼右丞且與百姓爲主邦彥等

編年錄

卷十三

十一

敬鄉樓叢書
第二輯

譚東以布衣脅天子不可赦淵聖不從邦彥既爲國人所
詬遂藏匿不敢復入皇恐乃乞致仕遂罷宰相以觀文殿
大學士充太一宮使 太宰兼門下侍郎李邦彥奏累具
劄子辨謗乞致仕知樞密院事吳敏奏辨李邦彥被謗之
無辜願下臣章曉諭國人乞加恩禮起邦彥詔曰太宰李
邦彥任政府累年屢形憂國愛民之誼以至謹惜名器抑
裁冗濫獻納非一朕在東宮時熟聞嘉譽策立之際備聲
忠誠金人犯闕其所建明惟知利社稷撫軍民爲急朕已
一一施行衆志未能徧諭乃作弗靖鼓唱流言反與前日
異意兇惡之人忽生怨憤實駭予聽已依所乞宮祠播告
中外咸信勿疑 二月二十四日庚申太學生沈長卿上
書曰臣聞二月初五日陛下罷李綱右丞太學生陳東等
率士數百伏闕上書極言李綱忠義李邦彥姦惡冀陛下
罷邦彥而相李綱以歷天下之論也於時京城百姓羣聚
闕庭不約而來者幾萬人祈哀請命莫不欲李綱之相邦
彥之罷也泊陛下遣使宣諭復綱舊職衆志遂定其後乘
勢恃衆毆擊內侍蓋緣平居細民受虐之深積怨之久以
至於是臣觀前日宰相吳敏有爲李邦彥辨雪功狀大書
文榜揭之通衢行道之人莫不嗤笑臣聞太學之論敏乃
蔡京父子上客密交奔走京門浸有年矣而邦彥與敏如
左右手也今所以曲爲邦彥強辨者止欲植黨自固邦彥
去則敏不能以獨立原敏之心本非爲朝廷論宰相實爲
身謀爾 李邦彥方能數日張邦昌又以太宰出質左右
揆皆虛位吳敏乃以劄子乞復用邦彥爲太宰其略曰軍

編年錄

卷十三

十二

敬鄉樓叢書
第二輯

民伏闕殺內侍毆宰相懼致高歡窺魏之事又言邦彥輔
佐上皇前歲罷易宰相更革政事定山東河北之寇皆出
其力又言建遣李鄴輩使金人軍中賴其力由是復拜邦
彥爲太宰吳敏以高歡之事劫羣下而驚人主不謂之姦
險陰賊吾不信也 校書郎陳公輔以李邦彥罷政事纔
數日復爲宰相人情震駭遂具奏論列太宰李邦彥中書
侍郎王孝迪尙書右丞蔡懋皆罷以吳敏爲少宰出邦彥
知鄧州邦彥奏乞持服從之其後臣僚復論其擾攘之際
惶駭無謀幾致敗事罪大無罰何以爲大臣之戒遂與白
時中俱落職
同日張邦昌太宰 自少宰兼中書侍郎授光祿大夫太宰兼門下侍郎
吳敏少宰 自知樞密院事授銀青光祿大夫少宰兼中書侍郎
敏少宰制曰朕祗膺聖訓獲紹丕基遵制揚功仰憲祖宗之舊
圖事揆策實資弼亮之賢爰得異才俾登宰路告爾在列咸聽
朕言 具言 氣和而智剛才通而識遠潛心自得學造古人之微
秉誼不回德全仁者之勇蚤儀禁蒙遂贊政機非堯舜不陳安
社稷爲悅定禁中之策實靖我家運堂上之奇遂固吾圉逮鈞
衡之虛次訂公議以咸歸是用陞之次輔之聯兼以西臺之侍
陪敦多邑躡進文階併錫寵光用昭眷注於戲概觀今日浩若
涉川考政列則本末失倫語財用則上下交困易於出令而宣
布者多違輕於用人而欺誕者得肆靡仗節以狗義咸撓利以
成風國勢頽靡而不張軍律玩愒而無紀非至公無以消黨與
非持重無以鎮姦萌卿其畢議而力行朕且虛己而傾佇往欽
成命以究永圖

二月乙卯少宰兼中書侍郎吳敏奏乞免所選官止以中大夫就職有旨可通議大夫就職敏奏再辭免通議大夫有旨以太中大夫就職三月二十三日覃恩授通議大夫

同日李綱知樞密院事

自中大夫尚書右丞除

制曰朕膺上天之景命嗣列聖之不圖以神器之重而知為君之難以萬幾之繁而知任賢為急乃眷本兵之地夙稱大政之樞肆求異材式隆殊委李綱官粹和而嚴正敦厚而高明智貫通變而有餘識究古今而不惑學以為道粹然君子之儒事不辭難綽有仁者之勇向瞻為望總轄南宮忠精深沃於朕心論議有輔於當世宜長機庭之務用專兵政之權運堂上之奇謀收輟中之勝算比者虜自悔禍天誘其衷首遣使以議和旋退師而歸國惟當謹守盟好申戒邊陲假革息民朕方修文德以來編年錄卷十三第十三敬鄉樓叢書第二編

遠有備無患爾其除戎器以防微往體朕懷抑思展蓋

十五日辛亥尚書右丞李綱劄子伏蒙聖恩除臣知樞密院祖宗舊法兵符出於密院而不得統其衆兵衆隸於三衙而不得專其制今日既統行營之兵又制樞密之令考於舊法未見其可有旨降詔不允綱又奏契勘祖宗之法樞密院事掌兵籍虎符三衙管軍諸路帥臣主兵柄各有分守所以維持軍政萬世不易之法也自童貫以領樞密院事為宣撫使既主兵權又掌兵籍虎符始壞祖宗之法以至今日不可不戒乞將團結到勤王正兵並交割與制置使司管勾其行營使司兵令撥歸三衙所有京城四壁守禦使司俟都城解嚴一面結絕三月癸卯命李綱迎道沿皇帝於南京六月李綱為河北河東宣撫使

同日耿南仲尚書左丞

自資政殿學士簽書樞密院事遷中大夫除樞

李稅尚書右丞

自正奉大夫同知樞密院事

辛亥宇文粹中罷尚書右丞

資政殿學士依前宣奉大夫差知江寧府

粹中自宣和六年九月除尚書右丞是年二月罷執政踰一年初命以右丞扈從上皇東幸已而除李綱以補其缺至是上皇還闕乃有是命三月有旨宇文粹中除資政殿學士充佑神觀使

癸丑种師道同罷知樞密院事

自檢校少保靜軍節度使京畿河北河東路宣撫使罷為檢校少傅兼洗軍節度使充太一宮使

制曰大臣國家之股肱賢將兵民之師表進而戮力克宣廟略之奇退以均勞式舉邦彝之茂肆涓剛日敷告治朝具官种沈毅而善謀靜重而不撓發明儒術說禮樂而敦詩書深練武經編年錄卷十三十四敬鄉樓叢書第二編

立功名而安邊境慮無愆素誼匪辭難有牧人御衆之材居能躬率有憂國愛君之志弗以家為克壯勤王之圖尤高衛社之績內參樞筭外總師干載惟年齒之尊閱煩官職之重俾從優暇宜渙恩徽希冤篆車越視亞傳之秩神旗豹尾改煥洸水之區仍領使於殊庭併衍封於采邑留以自近庶其少休庸示眷懷式昭體貌於戲子房畫策終竝赤松之遊秦穆誓言蓋思黃髮之問其暫釋於機務尚毋廢於謀猷茂對龍光益綏壽祉

四月甲寅以師道為河北河東宣撫使十月檢校少傅鎮洸軍節度使河北河東宣撫使种師道卒初師道揣虜必大舉入寇亟上疏請幸長安以避其鋒大臣以為怯召師道還既至病不能見卒於第年七十六贈開府儀同三司閔月虜再犯京師比城陷欽宗慟哭曰朕不用种師道言

以至於此始師道勸欽宗乘其渡河半擊之不從曰異日必爲後患故欽宗思其言嗟慟之後贈少保諡忠憲

甲寅貶責前宰執蔡京童貫蔡攸

蔡京自太師魯國公致仕責授中奉大夫祕書監分司南京

制曰九變而賞罰可言必待是非之審四罪而天下咸服蓋由

黜陟之公邦有常刑朕不敢已具官蔡京親逢聖旦被遇三朝四任

宰衡始終二紀述其行事殊咈師瞻假繼志述事之名爲蠹國

害民之政託豐亨豫大之說肆窮奢極侈之風祖宗憲章變更

幾盡公私儲積掃蕩無餘引邪佞於要途陷忠良於黨籍園第

僧踰於宮省子孫皆列於禁嚴交通替御而姦弊縱橫漁奪下

民而忿氣充塞毒既流於中國怨終嫁於上皇况在政和實倡

平燕之議既聞邊警遽先聚族以逃雖汝計之甚安顧國家而

編年

手

錄

卷十三

敬鄉樓叢書

第二

何賴士庶伏闕臺諫交章公論甚喧顧法不可尙念弼諧之舊

特優終始之恩俾長蘭臺往分留務曲全體貌俾許退休勉服

寬恩毋替循省

臣僚屢有章疏言蔡京蔡攸童貫罪侍御史孫覿等復上

言曰臣等謹按太師蔡京四任宰輔前後二十年挾繼志

述事之名建蠹國害民之政而祖宗法度廢移幾盡託豐

亨豫大之說倡爲窮奢極侈之風而公私積蓄掃蕩無餘

立御筆之限以陰壞封駁之法置曲學之科以杜塞諫諍

之路汲引羣小充滿要途錮禁忠良悉爲朋黨交通豎御

竊弄威柄鬻賣官爵貨賂公行閭閻混濁父子詬爭廝役

官爲橫行腰委封至大國書傳所記老姦巨惡未有如京

比者太上皇屢因人言灼見姦欺凡四罷免而近幸小人

相爲唇齒恐失所憑依營護壘蔽既去復用而京偃然自

謂羽翼已成根株盤固不可搖動兇焰益肆復出爲惡倡

導邊隙挑發兵端連起大獄報復睚眦怨氣充塞上干陰

陽水旱連年赤地千里盜賊滿野白骨如山人心攜離天

下解體於是敵人乘虛鼓行如入無人之境矣況京在政

和中首建平燕之議招納燕人李良嗣以爲謀主京之誤

國固不可容而與邊造患父子相爲終始且京被遇三朝

父祖子孫爲三公者二人親執政者三人登禁從者亡慮

十數名園甲第僭擬宮禁袍笏之寵下逮童稚顧京所蒙

何以論報不圖邊警上聞而京盡室數百輩治舟楫擁輕

齋一夕遁去君父孱然坐圍城中無一人有同患難之意

宰相非其人遂使中國空虛敵人侵侮無所不至而京猶

編年

年

錄

卷十三

十六

敬鄉樓叢書

第二

善爲姦言嫁怨飾非獨使上皇負謗於天下伏望勅使追

還早賜寬宥稍正京父子誤國之罪是時臣僚屢有章疏

論列不已乃命蔡京責授中奉大夫祕書監分司南京致

仕道

三月丙申蔡京責授崇信軍節度副使德安府安置

制曰呂刑三千論罪莫先於無上舜功四十知人實本於去兇

載稽先聖之格言參酌庶民之公論肆於元惡敢廢刑章具官蔡京

以疎愚不學之資挾輕果敢言之氣自初登用首務更張巧緣

紹述之名公肆劫持之計列聖貽謀之憲度掃蕩無餘一時異

議之忠賢芟鉅略盡竭府庫之儲以供浮費假爵祿之寵以市

私恩黎民疾痛而無樂生志士隱憂而欲祈死當上皇之覺悟

畏天戒之昭垂屢因衆惡而斥疎卒以自營而收召乃至交通

宮禁費用邦財真同妾婦之爲孰有穿窬之恥逮眇冲之臨御屬中外之艱虞靡知狗國之忠但出全軀之策靖言蠹敗已無及於噬臍悉舉愆尤殆不勝於擢髮彈章疊至匪朕敢私謂捨彼豺狼安用狐狸之間而養茲稂莠其如禾稼之傷原情本合於誅夷遠佞姑從於屏棄體予恩宥無怠省循

左司諫陳公輔劄子奏伏觀蔡京父子懷姦誤國願賜竄逐有旨京攸素有言章京可責授崇信軍節度副使德安府安置攸本合重責爲勸上皇北歸已降授太中大夫提舉亳州明道宮特依已降指揮令前去省侍四月蔡京移衡州安置五月丙寅責降蔡京韶州安置及子孫淵聖降旨下項久稽典憲衆議不容依此責降蔡京移韶州蔡京子孫並分送湖南吏部供到下項蔡京子孫脩修條條脩

編年錄

卷十三

十七

敬鄉樓叢書

脩子衛衡州蔡條邵州其逐人子各令隨侍父前去蔡條

蔡京子孫二十三

人七月甲戌蔡京移韶州

安置臣僚上言蔡京者且暮之人使遂盡死明法不行徒有後時之悔臣安敢避再三之瀆哉奉聖旨蔡京移儋州京在德安府被南遷之命王申到潭州乙酉以疾卒年八十自卒後臣僚論列京父子不已有旨條尙帝姬合離判者至是命條勒停初金人既長驅入寇天下罪京故言者請正其罪而殊殛之章屢上於是詔移京衡州安置言者論不已其奏曰自崇寧初蔡京輔政首亂舊章排斥異己汲引同類待以不次二紀之間門生故吏充牣天下又其建三衛置四輔疏興化之水修臨平之塔又令許敦仁奏請太上皇五日一視朝當此之時孰不爲朝廷寒心幸

編

年錄

卷十三

十八

敬鄉樓叢書

其族子有所陳告臺諫因之論列其事上皇雖務納汙猶令甄其墳山京之僭心終不肯已又加王安石王爵欲自爲階梯衆論喧騰心不自安復封韓琦以塞人言而蔡確何執中鄭居中童貫皆因之例封王矣本朝之封王者不過國初功臣及后族爾際國朝之法長姦雄之心京兇悖之情不可一一數賴上皇聖明不爲京邪說所惑京知狂謀終不得逞於是結附戚里內侍交通宮禁肆所欲爲以耗國財以弊民力必欲坐視顛覆以快不逞之意鄧洵武范致虛等託爲紹述之言以助京劫持上下而何執中余深林樵薛昂皆其死黨濟其姦謀成其羽翼使不可制權門日益盛強朝廷日益孤弱蔡卞蔡攸乃其子弟相與違異有若仇讎考其踪跡實皆同惡相濟至輔爲相奢汰愈甚開邊黷武禍及生靈迹其所來亦由京勢位相軋乃相攻陷遂致犬羊窺伺變生一旦造端立本捨京而誰詔京等永不放還如臣僚敢有引薦當正典刑左正言程瑀又攻之其奏曰竊惟蔡京首登宰輔尋踐公師二十年間逐而復來罷而復用致仕而復起交結閹宦密爲梯媒愚弄朝廷妄作威福名爲遵用熙豐之典乃實自爲紛更未有一事合熙寧者至於鑄鼎刊名位居九五臨平增山託名祝聖私第引河潛通宮掖閨門汗穢醜不可言屬者金人內侮事雖始於童貫而成於王黼與京之子攸然邊備廢弛本實由京金人入塞盡室東去非背叛而何乞投畀海外遂有是命

童貫自太師廣陽郡王徐豫國公責授左衛上將軍致仕池州

居住追廣陽郡王以

制曰任隆相將功必在於安邦位極公王義莫先於體國儻孤大用宜實嚴科具官夙侍宮闈亟膺重任付以兵柄時惟信臣護諸將垂二十年論戰伐無尺寸効惟事誕謾之術實乖撫御之宜紀律不嚴賞罰未當盡壞軍戎之政令肆紊朝廷之紀綱私室奄有其金繪軍須取償於州縣將士爲之解體吏民無不興嗟既敗累朝不渝之盟首結三邊無窮之禍號復故地實守空城再爲太原之行又倡雲中之議師徒暴露譴怨並興馴致敵人輕視中國遂震驚於都邑軫危懼於夙宵生此厲階誰執其咎議者皆不汝置朕心安得而私猶念股肱曲全體貌姑奪廣陽之封爵尙畀環尹之崇階俾即退休保其終始體予寬典毋忘欽承

編年

錄

卷十三

十九

敬鄉樓叢書
第二輯

侍御史孫觀等上言按童貫竊據兵權幾二十年出則爲宣撫而受制密院入則領密院而外兼行宣撫跋扈不臣嚙壞法制其罪有十又上言貫攸之罪同者六乃命童貫責授左衛上將軍致仕四月臣僚又上言童貫責授安化軍節度副使郴州安置五月丙寅責降童貫移英州安置七月丁丑臣僚復論童貫罪惡當誅戮奉聖旨童貫罪大責輕可移吉陽軍九月臣僚又上言臣獨論其可殺而不可赦者壞太祖之兵制敗眞宗仁宗之信誓通萬里之小夷殘百餘年之興國虜后欲歸却其表而不受虜主潛遁指其踪而使擒契丹舊臣痛入骨髓假手女眞俾之報怨旁結西夏共爲敵讎又上言今者竊聞有司檢校其家器用復有校椅以青龍首金銀絲背爲飾者不軌踪跡暴

編

年

錄

卷十三

二十

敬鄉樓叢書
第二輯

白無甚於此淵聖降旨童貫罪十薦朱勔起花石引趙良嗣滅契丹修延福宮等朕在東宮屢爲搖動策立之時有異語不俟勅命擅去東南差留守不受命東京被圍聞之而去家中有非法之物私養死士罪不容誅差監察御史張徽追貫行刑已卯斬童貫於南雄州函首赴闕史遺太祖嘗以幽燕地圖示趙普問以取燕之策普對以曹翰雖可取可守而難其代帝自此絕口不言伐燕至太宗因平河東乘勝欲擣燕薊時趙普鎮鄧州立疏諫止太宗下詔褒之熙寧間王安石用事始復勸神考用兵以鞭笞四夷先用王韶取熙河以斷夏人右臂又欲取靈石以斷燕人右臂又結高麗欲圖幽燕已而永樂敗報至神宗臨朝慟哭自此厭兵然亦由是感疾至棄天下以故司馬光呂公著輔相元祐推原先帝厭兵之意不賞邊功專務懷柔至章惇作相諸路復進築徽宗登極初棄遼鄆等州蔡京爲相又取之又遣趙良嗣爲海上之盟結大金以取燕雲以貫爲太師領樞密院事充陝西河東河北路宣撫使蔡攸副之王黼年少兇愎務欲其功高蔡京以燕雲自任置經撫房下族誅之令禁言北事者宣和七年十一月帝郊天方恭謝景靈宮聞金人稱兵向闕即下詔稱上皇禪位皇帝改元靖康於是諫官御史推原致寇召亂之端交章論貫奏蔡攸之罪同者有六又奏曰金人敢以數萬騎直犯宮闕者蓋將相大臣同惡相濟二十餘年所以至此蔡京竊弄威柄於前王黼敗壞法度於內童貫蔡攸敗亂法度於外爭權競利其初雖相爲矛盾至於包藏賊心害民

蠶國則若合符節乞將蔡京童貫罪於王黼一等行遣詔童貫責授昭化軍節度副使郴州安置而言者攻之不已於是天子下詔曰童貫罪十首薦朱勔起花石引趙良嗣滅契丹修延福宮等朕在東宮屢爲搖動策立之時有異語不俟勅命擅去東南差留守不受命東京解圍聞而惡之家有龍紅之物私養死士前項罪不容誅可告諭中外仍差監察御史張激將帶開封府公人前去追童貫隨所至州軍行刑訖函首赴闕其子孫送吉陽軍編管嗚呼趙普從祖宗定天下尙以取幽燕爲難而蔡京王黼童貫兇德參會乃獨謂幽燕可談笑取至使神州陸沉兩宮北狩遺千古無窮之恨推其禍端自王安石始可勝痛哉

蔡攸自太保領樞密院事燕國公責授太中大夫提舉亳州

編年錄

卷十三

二十一

敬鄉樓叢書
第二輯

明道宮任便居住

制曰位居台輔必資補袞之功職領樞庭允賴折衝之略儻乖成績宜解政機具官蔡攸擢自貴游初無學術早被聖神之眷亟登廊廟之隆不思直道以事君乃復邀功而誤國頃將虎旅同撫燕疆初乏遠謀大開邊隙既不能保盟於舊好又不能制勝於萬全遂以重兵挫於殘虜至傾國帑僅得空城納叛亡以啓戎心肆欺誕而忘國事逮金人之深入同邊備則茫然弗爲守備之圖惟事遁逃之計結怨稔禍逞其小己之私疾首痛心生此厲階之梗議者皆不汝置朕恩安得而私尙屈典刑曲存體貌其解本兵之柄仍鑄論道之官畀四品之文階領真祠於善地體予寬典毋忘欽承

侍御史孫覿等上言貫攸之罪同者有六屢有章疏論列

不已乃命蔡攸責授太中大夫提舉亳州明道宮三月丙

申奉聖旨京攸素有言章攸本合重責以攸專一扈從道君太上皇帝還闕特已降指揮令前去省侍五月丙寅責降蔡攸節度副使永州安置攸子衛衡行衛衍行先責授昭化軍節度副使襄陽府安置移洪州復移道州居住監察御史胡舜陟劄子言攸平昔不孝視父如仇讎惡言醜詆無所不至今見其父以罪逃竄往往快之始乞隨侍者殆欲自違罪戾終不肯往者乃不孝之真情且言其七罪有旨移潯州安置七月丁丑臣僚上言金人犯塞蔡攸聞家南遁名爲扈從上皇實背叛也乃敢肆爲欺罔謂勸上皇南歸有旨蔡攸移雷州九月臣僚上言陛下投蔡京於海外京恃宰相吳敏庇覆之故滯留道塗至長沙而卒敏之沮格言章不早投竄致京身死內地抵掌而嘆者紛紛然若攸之罪亦不減於乃父乞竄於海外毋使若京之早斃奉聖旨蔡攸置萬安軍旋與蔡條同賜死

辛亥王孝迪罷中書侍郎

孝迪以靖康元年正月除中書侍郎二月校書郎陳公輔論列太宰李邦彥中書侍郎王孝迪尙書右丞蔡懋皆罷孝迪遂以資政殿學士提舉醴泉觀執政纔一月以曾祖名政自陳乞罷所受職名改延康殿學士出知廬州四月臣僚上言臣伏觀陛下以大臣誤國悉行罷黜如李邦彥主議和李稅李鄴鄭望之奉使許地是有取金銀於民間而措置乖方爲國斂怨莫如王孝迪庸陋豈宜參預大政第以李邦彥姻家驟引爲中書侍郎云云遂落職提舉

編年錄

卷十三

二十二

敬鄉樓叢書
第二輯

亳州明道宮

三月戊辰李稅罷尙書左丞二

稅自靖康元年正月除同知樞密院事二月除尙書右丞

是月李稅與鄭望之李鄴並落職在外宮祠以奉使失辭

妄許地故也稅執政僅踰一月罷授正奉大夫資政殿學

士提舉亳州明道宮建炎三年九月戶部侍郎李稅靖康

爲執政遷尙書使往建康督饋以贍沿江諸軍

己已張邦昌罷太宰觀文殿大學士依前光祿大夫中太一宮使三日

制曰難進易退允高君子之風崇舊優賢實重朝廷之體眷予

元弼爲國良臣用捨雖係於時始終宜篤其義誕揚明命敷告

治廷具官張邦昌智沉而識精器博而用遠蚤登禁路廷臣無出其

先久預政機天下實受其賜嘉有功於社稷俾正位於台衡丙

編年錄卷十三 二十三 敬鄉樓叢書

吉有聲獨擅邊書之對王商多質有嚴漢相之威念其行李之

勤處以真祠之逸陞華祕殿庶便於諮詢陪賦爰田用昭於物

采於戲留侯知足願遺人事之勞南仲將歸毋憚簡書之急其

全明哲以保功名

邦昌自靖康元年正月拜相至是年二月罷入相兩月出

使金國未嘗就職後邦昌請元祐皇后垂簾聽政以太宰

退處資善堂自僭位號至是凡三十三日

同日徐處仁太宰自守中書侍郎授通奉大夫太宰兼門下侍郎

二月辛卯罷神霄玉清萬壽宮使副不復兼領使事

制曰國猶置器安危之勢相形治若循環文質之宜迭用方更

張於初載蓋圖任於老成人皆曰賢政將焉往具官徐處仁秉心強

固守道端方器博而周知輕辭宣之方略材全而藏用陋黃霸

之功名尙猶黃髮之詢實慰蒼生之望朕恭承聖訓嗣守丕基

思藝祖之艱難法仁皇之忠厚周封千八百國當謹守於輿圖

漢制二十三條期盡遵於軌迹欲興聖統無踰老臣庸登左揆

之崇兼列東臺之侍並增爵邑昭示寵光於戲多難以興在彊

勉而行道無爲而治期垂拱以仰成其蹈古人之爲毋負天下

之譽

初處仁守北門上聞其老成有士望方倚以爲相故以中

書侍郎召之入見首論禦夷狄者不一而足朝廷甘言重

幣修好可也何至捐三鎮以與之陛下受祖宗之天下尺

地豈可與人矧保塞奉二祖之陵寢中山爲陛下之始封

夷狄變詐自古難測今要盟劫質侵侮莫甚但見其還從

而信之則過矣上矍然曰卿言是也吾意亦爾取詔書示

編年錄卷十三 二十四 敬鄉樓叢書

處仁乃諭守三鎮者自是稍議禦戎而詔三鎮堅守視事

未旬日遂拜相云太學生陳東上書乞召唐恪及徐處

仁置諸左右於是拜處仁爲太宰處仁奏乞早建立皇太

子又奏乞修身治國常如今日淵聖覽奏御批曰覽卿所

奏甚善朕志素定無有少易又奏行馬政募鄉兵七月

庚寅處仁辨明吳若上書先是太學正吳若上書言耆舊

間若徐處仁者號爲勤儉公方然陛下召之而士論

已喧謂其嘗以十事乞留蔡京也而處仁以爲己非京之

黨且未嘗有留京之謀乃奏劄乞罷解機務守本官致仕

以全晚節淵聖命吳若令分析申尙書省

同日唐恪中書侍郎自正議大夫同知樞密院事依前官除

何栗尙書右丞自翰林學士知制誥

許翰同知樞密院事自御史中丞

翰同知樞密院事制曰三代而上文武一致故在汴獻猷儒者事也國家設爲樞府以重兵政而總以經術大臣蓋本諸此歷選在服今得偉人許翰與學造微靖節自守擅君房言語之妙有揚雄深湛之思封駁東臺執法烏府問譽美矣茲予命爾進貳樞柄以辨博過人之才而論金華之要以通敏沈識之智而運帷幄之籌庶幾安邊息民以展不治夫國之大事戎居其一天生五材兵不可去長轡遠馭方資深謀思患預防宜有所備勉旣爾志矜觀策勳

樂字文縝僊井監人政和五年進士第一翰字崧老拱州人 格執政七月至八月拜相 翰靖康初李綱薦其忠直召爲御史中丞言蔡京蔡攸童貫之罪而責之至是除編年錄卷十三 第二編

同知樞密院事

庚午宇文虛中罷簽書樞密院事授資政殿學士依前中大夫知青州

制曰遴選豪傑俾職祕殿所以隆儒術而備詢訪也乃瞻樞臣深執謙抑肆申新命式顯高風文具官字器度恢宏謀議英發潤身以淵博之學華國以雅健之文藩郡剖符治效擅循良之譽禁林視草詔辭見典誥之風參翊機廷以重兵政惟時大學士之職乃朕待非常之材豈狗舊典之拘是爲不次之舉而爾毅然抗疏陳義甚高難抑雅懷勉狗來請雖未稱朕褒崇之禮而益嘉爾辭遜之心往服訓言毋忘報塞

虛中在樞府凡兩月以奉使無狀故責授焉時監察御史胡舜陟劄子奏曰今日威令未振人皆玩法蓋由爵賞廢也宇文虛中爲重賞參謀實啓邊患及聞寇至輒先遁歸

既不卽加罪且以虛中爲資政殿學士東京宣諭使而虛

中不肯就職逃宿毫間此於律當誅也今乃處樞府蒙重任欲望檢會臣僚所論宇文虛中等罪狀及御史臺奏勸擯離職任姓名卽賜施行四月臣僚論罷青州落職提舉亳州明道宮建炎二年五月丙申詔宇文虛中復資政殿大學士先是謫授散官安置宇文虛中應詔願使絕域遂召赴行在丙申復資政殿大學士尋遣使金國祈請二聖淳熙六年賜故資政大學士左太中大夫充金國信使贈開府儀同三司宇文虛中諡肅愍以女字文氏陳請也狀云故父於建炎年間奉使金國抗節不屈被虜人鎖繫北去後至紹興十二年間故相檜將故父全家發遣北去至紹興十六年故父與氏親兄師爰同爲翰林學士高譚等

編年錄卷十三 第二編

結集徒衆欲候虜主祭天就行劫殺志期恢復不幸敗露

致虜人將故父全家盡行殺戮故賜今諡嘉泰二年紹節

以建廟請於朝賜諡忠顯云紹節嘉定間簽書樞密院事

四月癸卯耿南仲門下侍郎自太中大夫尙書左丞依前官除七日

制曰爲君莫大於知人用人莫先於求舊置諸左右必惟正直之人重以典刑蓋賴老成之智眷時賢弼進貳東臺肆敷寵章

以昭茂烈南仲具官清明不撓敦大有容迪德爲君子之儒窮經

得聖人之旨道適堯舜之正言合稷契之忠翊贊青宮允資調

護之益參陪廊廟更殫啓沃之誠識侔著龜氣勁金石矧黃門

出納之地乃大政襟喉之司茲疇顯庸用申褒律噫呂望天下

之大老蕭何一代之宗臣惟我耆英豈媿前哲勉據所學永底

不平

六月以潛邸恩除正奉大夫十一月壬午命耿南仲使幹
萬不軍

己酉趙野罷門下侍郎資政殿學士
知襄陽府

野自宣和五年二月除尚書右丞六年九月除尚書左丞
靖康元年正月除門下侍郎是年四月罷執政踰三年至
是宣和舊臣皆已去位而言者論野輔政無狀故有此命

十一月丙戌趙野落職提舉西京嵩山崇福宮

六月甲辰路允迪罷簽書樞密院事自資政殿學士提舉
醴泉觀九日

八月乙未徐處仁罷太宰觀文殿大學士正議大夫太一宮使

吳敏罷少宰觀文殿學士通議大夫醴泉觀使

處仁罷太宰制曰圖治有要在人主所寶惟賢充位無聞則朝
廷焉用彼相眷予上宰久預政機謀猷罔著於事功體貌務全
編年錄 卷十三 二十七 敬鄉樓叢書 第二輯

於終始誕敷明命播告多方具官徐處仁器質敦龐才能敏邵蚤年

治郡素高黃霸之風晚歲裕民竊陋桑羊之政比疇雅望進列
冢司允籍老成庶殫忠悃矧國步艱難之日乃廟堂協贊之時
不知黽勉以赴功相與逡巡而固寵乏可否之相濟惟同異之

是聞寇患未寧念寸陰之可惜機會一失恐駟馬之難追道路
流言士夫興嘆覽封章之引咎且公論之騰喧俾解鈞衡進陞
祕殿即祠宮之優佚昭命數之益隆併衍爰田申陪眞賦於戲

任舊人以共政朕豈有意於遐遺詢黃髮則罔愆汝尙無忘於
入告往祇予訓其體眷懷

處仁自靖康元年三月拜相是年八月罷入相僅半年御

史中丞李同等論其與吳敏不和稽留議和之使而有是

命翌日出知東平府處仁引疾乞致仕遂以本官提舉西

京崇福宮云拜罷李回上言太宰徐處仁初以蔡京薦進

自縣令不三年備位政府綽綽其速化而不聞其有善
譽也自金人退師陛下採其治郡之能擢爲首相而不知

大體不通時變不能副具瞻之望處仁由是罷相史遺建

炎元年七月舊相觀文殿學士徐處仁卒初以舊相徐處

仁爲大名尹時已被病至是卒於大名曆小

敏罷少宰制曰朕嗣承丕緒統御萬方當論相之初賴股肱之

允協至臨事之際乃矛盾之是聞念久居於廟堂宜曲全於體

貌我有明命處於大廷具官吳敏性識靜深器資閑達高

國鯁論足以濟時頃上皇臨朝偏歷從臣 暨眇躬踐阼首

登揆路之崇藉爾孤忠輔 寇攘之未靖顧宗社之可

虞有厝火積薪之危有垂髮九淵之懼爾乃玩歲而愒日莫知

排難而解紛持首鼠之兩端乏鈇刀之一割寢稽使指潛失事

機致公論之騰喧亟刻章而瀝懇宜解鼎司之重任就陞祕殿

之隆名均逸真祠併昭異數於戲閔勞以事尙素節之可觀益

勵乃忠想嘉猷之未替往祇休寵勿忘壯圖

敏自靖康元年二月拜相至是年八月罷入相踰半年御

史中丞李回上言少宰吳敏初以蔡京欲聯親議遂以辟

雍私試高等入仕因與京結爲死黨在上皇朝綽綽目之

謂在劉昌林據之右上皇內禪報旨先定父子授受夫復

何疑而敏因蔡攸刺得密旨乃貪天功以爲己有叨處二

府竊據相位凡其施設悉効蔡京意在專權固寵以小忿

交爭黜座之前二人因以不和而天下之事遂致不決吳

敏由是與徐處仁皆罷相史遺初太學生陳東上書言上

皇傳位陛下蓋其聖志素定惟此蔡京王黼童貫等六賊實管撓之而蔡攸者沮遏尤力賴上皇聰明獨斷至莫之奪贊襄之功豈敏有言及吳敏爲宰相太學正吳若上書謂敏非宰相才不可爲宰相且蔡京蔡攸李邦彥之黨也前日建請上皇遜位乃蔡攸父子鉤探先旨計會吳敏爲之翼敏立朝庇其宗禍士論指爲蔡攸死黨其後敏欲微示至公以欺天下乃乞召吳若還及授陳東以官六月臣僚論列蔡京之罪奉聖旨京攸永不放還如臣僚敢有薦引當正刑章宸命既下大臣吳敏又有爲之庇護者遂以祠部員外郎陸守等持節廣南平日與京攸結爲死黨似欲與蔡氏爲地者臣僚復論若此差除雖無薦引之實而有庇護之嫌於是守等皆放罷 九月戊辰臣僚上言前宰臣吳敏雖罷相猶爲觀文殿學士知揚州乞正刑章提舉亳州明道宮庚午臣僚上言吳敏蔽覆蔡京父子有旨落職宮觀壬申臣僚上言有旨責授崇信軍節度副使涪州安置

制曰爲臣之惡莫大貪天之功失職之刑孰先誤國之罪宜加顯黜用穆師言吳敏性稟柔邪中藏險詐竊名第以微幸之術盜倚注於擾攘之時惟眇質之纘承蓋上皇之素定乃緣私黨之託謂有建言之因迨竄兇渠果忘公議究概黨庇之迹詎符陰告之情且朕方勤政躬宵旰之憂而爾乃懷安肆娛樂之奉用人論事濟姦慝則有之料敵籌兵失機會已多矣稽使指有後時之慢忽邊防無先事之圖謀皆不臧咎將誰執有相若此爲國之羞既邦憲之稍伸致人言之不置貶從散秩投畀遐方

尙體寬恩勿忘循省

九月甲戌詔曰宣和七年十二月二十日上皇降敕旨建朕開封牧乃用太宗故事卿大夫知將內禪矣乃二十一日宣制而百司庶府以至都人亦莫不知是時蔡攸領樞密院事自知罪惡貫盈他日不免乃引給事中吳敏於宣制日入至玉華閣乃禁中深密之地非外廷臣所得至處蓋攸方經營江浙之行欲留心腹之人置之京師伺候動息中外相應其事詭祕難使衆知故引敏入深密之地與謀之爾攸既東行言章擊蔡氏者日至而敏傾身障之詭計百出終以敗露及蔡京子孫皆遠貶而京與條至荆南託進士黃大本附書寄敏爲開封府緝捕得之其書責敏曰僕父兄於閣下可謂有德矣云云由條書觀之敏之爲蔡氏腹心明矣且朕以太子受禪何待人言若以爲嘗言則入玉華閣之日乃在降旨建言之次日攸乃詐傳命令以敏有建言之功擢爲門下侍郎其姦僞締結乃敢如此投諸遐裔亦輕典爾故茲詔示可付史館仍布告天下紹興元年六月舊相吳敏復觀文殿學士充廣西湖南宣撫使初舊相吳敏方謫居涪州范宗尹薦敏復觀文殿學士知潭州敏以祖母年高力辭遂改資政殿學士提舉洞霄官至是又復敏觀文殿之職充廣西湖南宣撫使

同日唐恪少宰

自正奉大夫少宰兼中書侍郎

制曰周室任賢詩雅美甫申之維翰漢朝命相史官稱丙魏之有聲皆垂希世之名用起中興之治朕念疆陲未靖輔佐罔功爰得真才付以機柄繫生靈之休戚寄社稷之安危咨爾在廷